


PRIRUČNIK
**ISLAMSKI
BRAK**

*Ljubav, odgovornost i zajednički
put prema Allahovom zadovoljstvu*



VJERA



PORODICA



LJUBAV



POŠTOVANJE



HARMONIJA

Autor:
ISMAIL FETIĆ

ISLAMSKI BRAK

Ljubav, odgovornost i zajednički put
prema Allahovom zadovoljstvu

Priručnik za buduće i sadašnje supružnike

Izdanje za potrebe predbračnog savjetovanja i edukacije supružnika

Ovaj priručnik pruža opće vjerske i odgojne smjernice. Ne zamjenjuje pojedinačnu fetvu, pravni savjet, medicinsku pomoć, porodično savjetovanje niti stručnu terapiju. Za složene slučajeve treba se obratiti kvalificiranom imamu, islamskom pravniku, advokatu ili odgovarajućem stručnjaku.

Autor: Ismail Fetić

Bošnjački islamski centar Hamilton

Hamilton, Ontario, Canada

PREDGOVOR AUTORA

U ime Allaha, Milostivog, Samilosnog.

Hvala Allahu, Gospodaru svih svjetova. Njega hvalimo, od Njega pomoć i oprost tražimo i molimo Ga da nas uputi i učvrsti na Pravome putu. Neka su salavat i selam na našeg voljenog Poslanika Muhammeda, sallallahu alejhi ve sellem, njegovu časnu porodicu, ashabe i sve one koji njegov put slijede do Sudnjega dana.

Ovaj priručnik nastao je iz potrebe da se budućim supružnicima na jasan, jednostavan i savremen način predstave smisao islamskog braka, uvjeti njegovog sklapanja te prava i obaveze koje muž i žena preuzimaju jedno prema drugome.

Tokom dugogodišnje imamske službe obavio sam mnoga šerijatska vjenčanja, razgovarao s mladencima, savjetovao bračne parove i susretao se s različitim porodičnim pitanjima i iskušenjima. Neki supružnici ulazili su u brak dobro pripremljeni, svjesni da je brak odgovornost i emanet. Drugi su se više pripremali za svadbenu svečanost nego za život koji nakon nje dolazi.

Često se mjesecima bira sala, odjeća, hrana i dekoracija, dok se veoma malo vremena posveti razgovoru o vjeri, karakteru, finansijama, djeci, roditeljima, međusobnim očekivanjima i načinu rješavanja budućih nesuglasica. Svadba traje jedan ili nekoliko dana, ali brak bi trebao trajati cijeli život.

Cilj ovog priručnika nije predstaviti brak kao život bez problema. Takav brak ne postoji. Cilj je pokazati kako se ljubav čuva kada dođu iskušenja, kako se razgovara kada postoje različita mišljenja, kako se priznaje greška, kako se prašta i kako supružnici mogu biti pomoć jedno drugome na putu prema Allahovom zadovoljstvu.

Posebna pažnja posvećena je životu muslimanske porodice u dijaspori. Naše porodice žive između različitih kultura, jezika i životnih vrijednosti. Zato trebamo čuvati svoju vjeru i identitet, a istovremeno biti korisni, odgovorni i dostojanstveni članovi društva u kojem živimo.

Molim Uzvišenog Allaha da primi ovaj trud, oprosti njegove nedostatke i učini ga korisnim svima koji ga budu čitali.

Ismail Fetić

SADRŽAJ

1. Uvod
2. 1. Šta je islamski brak?
3. 2. Vjera kao temelj braka
4. 3. Svrha bračne zajednice
5. 4. Izbor bračnog druga
6. 5. Zaruke i period prije braka
7. 6. Pitanja prije braka
8. 7. Znakovi upozorenja
9. 8. Smetnje za sklapanje braka
10. 9. Ko može obaviti vjersko vjenčanje?
11. 10. Čin sklapanja braka
12. 11. Mehr - pravo i dostojanstvo žene
13. 12. Temeljna prava i obaveze supružnika
14. 13. Dužnosti muža
15. 14. Prava žene
16. 15. Dužnosti žene
17. 16. Zajedničke dužnosti supružnika
18. 17. Komunikacija u braku
19. 18. Rješavanje nesuglasica
20. 19. Finansije u braku
21. 20. Intimnost, nježnost i privatnost
22. 21. Društvene mreže i savremeni izazovi
23. 22. Odnos prema roditeljima i rodbini
24. 23. Djeca kao Allahov emanet
25. 24. Prava djeteta
26. 25. Odgoj djece u dijaspori
27. 26. Kada brak dođe u krizu
28. 27. Razvod braka
29. 28. Dvadeset smjernica za sretan brak
30. 29. Pitanja za bračno preispitivanje

31. 30. Izjava i dogovor o mehru

32. 31. Naš zajednički bračni dogovor

33. Zaključak

34. Dova za mladence i porodicu

UVOD

„Udavajte neudate i ženite neoženjene među vama, i čestite robove i robinje svoje; ako su siromašni, Allah će im iz obilja Svoga dati. Allah je neizmjereno dobar i sve zna.“ (En-Nur, 32)

„O skupino mladića, ko od vas ima mogućnosti, neka se oženi, jer će tako najbolje sačuvati pogled i čednost.“ (Buhari i Muslim)

Brak u islamu nije samo zajednički život muškarca i žene, niti je samo društveni običaj, porodična svečanost ili pravni ugovor. Islamski brak je ozbiljan emanet, čvrst zavjet i odgovornost koju supružnici preuzimaju pred Uzvišenim Allahom.

U braku se susreću dvije osobe, dvije porodice, dva životna iskustva, dvije naravi i dva načina razmišljanja. Supružnici ne stupaju u brak kao savršeni ljudi, nego kao vjernici koji trebaju zajedno sazrijevati, učiti, popravljati svoje nedostatke i pomagati jedno drugome na putu dobra.

„I jedan od dokaza Njegovih jeste to što za vas, od vrste vaše, stvara supružnike da se uz njih smirite, i što između vas uspostavlja ljubav i milost; to su, zaista, pouke za ljude koji razmišljaju.“ (Er-Rum, 21)

Ovaj ajet govori o tri velika temelja bračnog života: smirenosti, ljubavi i milosti. Ljubav približava supružnike, milost ih čuva u teškim danima, a smirenost njihov dom čini sigurnim mjestom. Uspješan brak nije brak bez problema, nego brak u kojem se problemi rješavaju vjerom, razgovorom, poštovanjem, strpljenjem i spremnošću na oprost.

1. ŠTA JE ISLAMSKI BRAK?

Islamski brak ili nikah jeste ugovor zaključen između muškarca i žene, njihovom slobodnom voljom i uz ispunjavanje šerijatskih uvjeta, kojim jedno drugome postaju dozvoljeni supružnici i preuzimaju međusobna prava i obaveze.

Brak nije valjan ako je sklopljen pod prisilom. Saglasnost muškarca i žene mora biti jasna, slobodna i nedvosmislena. Za valjanost braka potrebno je da ne postoje šerijatske zapreke, da postoji jasna ponuda i prihvatanje, da budu prisutni propisani svjedoci i da se zaštite prava obje strane.

Šerijatski brak treba biti poznat i javno obznanjen. U zemljama poput Kanade potrebno je poštovati i građanske zakone, jer registracija braka štiti prava supružnika i djece.

2. VJERA KAO TEMELJ BRAKA

Osoba koja stupa u islamski brak treba poznavati osnovna načela svoje vjere i biti spremna svoj porodični život graditi u pokornosti Allahu.

Vjera nije samo izgovorena riječ. Ona se pokazuje kroz namaz, poštenje, odgovornost, odnos prema supružniku, roditeljima, djeci i drugim ljudima. Nije dovoljno da se vjera spomene samo na dan vjenčanja; ona treba oblikovati svakodnevni život porodice.

3. SVRHA BRAČNE ZAJEDNICE

Brakom se postiže Allahovo zadovoljstvo, slijedi sunnet, čuva čednost, uspostavlja ljubav i smirenost, gradi porodica i stvaraju uvjeti za odgovoran odgoj djece.

Prava vrijednost braka vidi se u tome koliko supružnici jedno drugo podstiču na namaz, halal zaradu, dobročinstvo, sabur i lijep ahlak.

4. IZBOR BRAČNOG DRUGA

Izbor supružnika jedna je od najvažnijih životnih odluka i ne treba se donositi samo na osnovu trenutnih emocija, fizičkog izgleda, imetka ili pritiska okoline.

Pri izboru treba gledati vjeru, karakter, odgovornost, iskrenost, odnos prema porodici i način na koji osoba postupa kada je ljuta ili pod pritiskom. Roditelji trebaju biti savjetnici i podrška, ali konačni pristanak pripada osobi koja stupa u brak.

Prije konačne odluke preporučuju se istihara, savjetovanje s pouzdanim ljudima i otvoren razgovor o važnim životnim pitanjima.

5. ZARUKE I PERIOD PRIJE BRAKA

Zaruke su obećanje i najava braka, ali nisu brak. Zaručnik i zaručnica prije nikaha nisu supružnici i među njima i dalje važe islamske granice.

Period zaruka treba iskoristiti za ozbiljne razgovore, upoznavanje porodica i pripremu za zajednički život. Raskid zaruka može biti bolan, ali je manje štetan od ulaska u brak za koji već postoje ozbiljna upozorenja.

6. PITANJA O KOJIMA TREBA RAZGOVARATI PRIJE BRAKA

Vjera i način života

Kakvo mjesto namaz ima u našem životu?

Kako zamišljamo islamsku atmosferu u domu?

Koliko nam je važno učešće u džematu?

Kako ćemo rješavati razlike u vjerskim pitanjima?

Karakter i komunikacija

Kako reagujemo kada smo ljuti?

Jesmo li spremni priznati grešku i zatražiti oprost?

Kako ćemo rješavati nesuglasice?

Kome ćemo se obratiti kada sami ne možemo riješiti problem?

Finansije

Postoje li dugovi ili druge obaveze?

Kako ćemo voditi budžet i štednju?

Kako ćemo donositi veće finansijske odluke?

Kako ćemo pomagati roditeljima i rodbini?

Djeca i roditeljstvo

Želimo li djecu?

Kako zamišljamo njihov odgoj?

Kako ćemo djecu učiti islamu i bosanskom jeziku?

Kako ćemo uskladiti posao i roditeljske obaveze?

Roditelji i privatnost

Gdje ćemo živjeti?

Kako ćemo održavati odnose s obje porodice?

Kako ćemo postaviti granice prema pretjeranom miješanju?

Šta smatramo bračnom privatnošću?

Zdravlje i životne okolnosti

Postoji li zdravstveno stanje o kojem budući supružnik treba znati?

Postoji li ovisnost, dug ili ozbiljna okolnost koja se ne smije skrivati?

Jesmo li spremni potražiti stručnu pomoć kada bude potrebna?

Ova pitanja nisu ispit koji treba položiti, nego prilika da se na vrijeme otkriju razlike, razjasne očekivanja i pronađu moguća rješenja.

7. ZNAKOVI UPOZORENJA PRIJE SKLAPANJA BRAKA

- fizičko nasilje, prijetnje i zastrašivanje
- psovanje, vrijeđanje i ponižavanje
- pretjerana ljubomora i kontroliranje
- odvajanje osobe od porodice i prijatelja
- ovisnosti i prikrivanje važnih činjenica
- nekontrolirana srdžba i stalno prebacivanje krivice
- korištenje vjere kao sredstva prisile
- pritisak da se brak sklopi brzo i tajno
- nepoštivanje jasno postavljenih granica

Obećanje da će se neko promijeniti nije isto što i stvarna, dugotrajna promjena ponašanja.

8. SMETNJE ZA SKLAPANJE BRAKA

Prema islamskim propisima postoje trajne i privremene zapreke za sklapanje braka. Među trajne zapreke spadaju određeni stepeni krvnog srodstva, srodstvo nastalo brakom i srodstvo po mlijevu. Među privremene zapreke može spadati period iddeta, kao i druge okolnosti propisane islamskim pravom. Zbog složenosti pojedinih slučajeva potrebno je razgovarati s kvalificiranim imamom ili islamskim pravnikom.

9. KO MOŽE OBAVITI VJERSKO VJENČANJE?

Šerijatsko vjenčanje treba obaviti ovlašteni imam koji poznaje propise braka, vodi potrebnu evidenciju i postupa u skladu s pravilima Islamske zajednice i zakonima države u kojoj djeluje. U Kanadi je važno razlikovati šerijatsko sklapanje braka od građanske registracije i prethodno ispuniti sve zakonske obaveze.

10. ČIN SKLAPANJA BRAKA

Prije vjenčanja imam utvrđuje identitet mladenaca, njihovu slobodnu saglasnost, nepostojanje zapreka, dogovoreni mehr i prisustvo propisanih svjedoka. Mlada i mladoženja jasno izjavljuju da prihvataju jedno drugo za supružnika, a svjedoci potvrđuju da su čuli njihove izjave.

„Barekallahu leke ve bareke alejke ve džeme‘a bejne kuma fi hajr.“

Neka ti Allah podari bereket, neka na tebe spusti Svoj bereket i neka vas sjedini u dobru.

Bereket braka ne mjeri se veličinom svadbene sale, brojem gostiju ili cijenom odjeće. Bereket je u iskrenoj namjeri, halalu, dovi, skromnosti i čuvanju od grijeha.

11. MEHR - PRAVO I DOSTOJANSTVO ŽENE

„I draga srca ženama vjenčane darove njihove podajte.“ (En-Nisa, 4)

Mehr je obavezni vjenčani dar koji muž daje ženi. To je njeno isključivo pravo. Može biti isplaćen odmah, odgođeno ili djelimično odmah, a djelimično kasnije. Dogovor treba biti jasan i zapisan. Mehr nije cijena žene, nego izraz poštovanja, odgovornosti i ozbiljnosti bračnog ugovora.

12. TEMELJNA PRAVA I OBAVEZE SUPRUŽNIKA

„One imaju isto toliko prava koliko i dužnosti, prema onome što je pravedno.“ (El-Bekara, 228)

Brak ne može opstati ako svako govori samo o svojim pravima, a zaboravlja svoje obaveze. Prava i obaveze služe zaštiti dostojanstva, sigurnosti i stabilnosti porodice.

13. DUŽNOSTI MUŽA

- osigurati izdržavanje porodice prema mogućnostima
- isplatiti dogovoreni mehr
- lijepo i pravedno postupati prema supruzi
- čuvati bračnu vjernost i privatnost
- savjetovati se o važnim odlukama

-
- učestvovati u odgoju djece i kućnim obavezama
 - poštovati njene roditelje i rodbinu
 - ne vrijeđati, ponižavati, zastrašivati niti koristiti vjeru za kontrolu

Nasilje, prijetnje, psovanje i ponižavanje nisu znak muškosti niti islamskog autoriteta, nego nepravda za koju će čovjek odgovarati pred Allahom.

14. PRAVA ŽENE

- pravo na poštovanje, sigurnost i dostojanstven život
- pravo na mehr i izdržavanje
- pravo na vlastitu imovinu i zaradu
- pravo na obrazovanje i održavanje rodbinskih veza
- pravo da učestvuje u porodičnim odlukama
- pravo na privatnost i zaštitu od nasilja
- pravo da odbije ono što je grijeh ili nepravda
- pravo da zatraži pomoć kada su njena prava ugrožena

15. DUŽNOSTI ŽENE

- čuvati bračnu vjernost, čast i privatnost
- poštovati supruga i razgovarati s njim dostojanstveno
- odgovorno se odnositi prema domu i imetku
- učestvovati u brizi i odgoju djece
- poštovati muževu porodicu
- izbjegavati vrijeđanje, ponižavanje i manipulaciju
- pomagati suprugu u vjeri i dobru

Poštovanje mora biti obostrano. Kao što muž nema pravo ponižavati ženu, ni žena nema pravo vrijeđati ili emocionalno zlostavljati muža.

16. ZAJEDNIČKE DUŽNOSTI SUPRUŽNIKA

- njegovati ljubav i međusobno poštovanje
- čuvati vjernost i privatnost doma
- savjetovati se i zajednički donositi važne odluke
- učestvovati u odgoju djece
- podržavati jedno drugo u ibadetu
- razgovarati o finansijama
- održavati veze s obje porodice
- pomagati jedno drugome u bolesti i teškoćama
- tražiti pomoć kada problem ne mogu sami riješiti

„One su odjeća vaša, a vi ste odjeća njihova.“ (El-Bekara, 187)

Odjeća čovjeka pokriva, štiti, grije i uljepšava. Tako supružnici trebaju pokrivati nedostatke jedno drugoga, pružati sigurnost i pomagati jedno drugome da budu bolji ljudi.

17. KOMUNIKACIJA U BRAKU

Mnogi brakovi ne slabe zato što nema ljubavi, nego zato što supružnici ne znaju razgovarati. Nije dovoljno govoriti; potrebno je znati saslušati. Treba opisati problem bez napadanja ličnosti i izbjegavati uvrede, prijetnje razvodom, spominjanje starih grešaka, vrijeđanje porodice i iznošenje bračnih problema na društvenim mrežama.

Kada su oboje veoma ljuti, mudrije je smiriti se i razgovor nastaviti kasnije. Ipak, šutnja ne smije postati kazna koja traje danima.

18. RJEŠAVANJE NESUGLASICA

1. Utvrditi šta je stvarni problem.
2. Saslušati jedno drugo bez prekidanja.
3. Odvojiti činjenice od pretpostavki.
4. Izbjegavati riječi „uvijek“ i „nikada“.
5. Tražiti rješenje, a ne pobjednika.
6. Priznati grešku i zatražiti oprost.
7. Dogovoriti konkretan naredni korak.
8. Potražiti pomoć imama ili stručnjaka kada je potrebno.

U slučaju nasilja, prijetnji ili ozbiljne opasnosti, sigurnost ugrožene osobe i djece ima prednost. Takve situacije ne smiju se skrivati pod izgovorom čuvanja porodične časti.

19. FINANSIJE U BRAKU

Novac je čest uzrok bračnih sukoba. Zato supružnici trebaju otvoreno razgovarati o prihodima, dugovima, troškovima, štednji, pomaganju roditeljima i većim kupovinama. Skrivanje dugova, rasipanje, tajne kupovine i finansijska kontrola ozbiljno ugrožavaju povjerenje. Halal zarada donosi bereket, a vrijednost čovjeka ne određuje visina njegove plate.

20. INTIMNOST, NJEŽNOST I PRIVATNOST

Intimni život je važno pravo oba supružnika. O njemu se treba govoriti dostojanstveno, otvoreno i s razumijevanjem. Grubost, prisila, ismijavanje i ucjenjivanje suprotni su ljubavi i milosti na kojima brak treba počivati. Intimni detalji bračnog života ne smiju se iznositi drugim ljudima.

21. DRUŠTVENE MREŽE I SAVREMENI IZAZOVI

-
- ne dopisivati se tajno na način koji ugrožava brak
 - ne objavljivati svađe i privatne informacije
 - ne uspoređivati svoj život s idealiziranim slikama drugih
 - odvojiti svakodnevno vrijeme bez telefona
 - ne koristiti lozinke i uređaje za manipulaciju
 - graditi povjerenje bez tajnog života i bez stalnog nadzora

22. ODNOS PREMA RODITELJIMA I RODBINI

Brak ne prekida obavezu dobročinstva prema roditeljima, ali roditelji ne trebaju upravljati bračnim životom svoje djece. Supružnici trebaju poštovati obje porodice, postaviti jasne i pristojne granice i ne prisiljavati jedno drugo da bira između braka i roditelja. Savjet treba tražiti od mudrih, povjerljivih i pravednih osoba.

23. DJECA KAO ALLAHOV EMANET

„O vi koji vjerujete, sebe i porodice svoje čuvajte od Vatre.“ (Et-Tahrim, 6)

Roditeljska odgovornost ne svodi se samo na hranu, odjeću i školu. Roditelji su dužni djeci pružiti vjeru, ljubav, vrijeme, pažnju, sigurnost i lijep primjer. Djeca više uče iz onoga što vide nego iz onoga što im roditelji govore.

24. PRAVA DJETETA

- lijepo ime dozvoljenog značenja
- ljubav, prihvatanje i sigurnost
- zdravstvena briga i obrazovanje
- upoznavanje s vjerom
- pravedan odnos među djecom
- vrijeme s roditeljima
- zaštita od fizičkog i emocionalnog nasilja
- pravo da bude saslušano u skladu s uzrastom

25. ODGOJ DJECE U DIJASPORI

Djeca u dijaspori svakodnevno susreću različite vrijednosti i životne stilove. Zabrane bez objašnjenja nisu dovoljne. Potrebno je razgovarati s djecom o vjeri, uključiti ih u mekteb i džemat, upoznati njihove prijatelje, pratiti sadržaje koje gledaju, njegovati bosanski jezik i graditi odnos u kojem će se roditeljima obratiti kada pogriješe ili se nađu u problemu.

Cilj je odgojiti samopouzdanog muslimana, osobu lijepog ahlaka i korisnog člana društva.

26. KADA BRAK DOĐE U KRIZU

-
- iskren i smiren razgovor
 - priznanje vlastitih grešaka
 - konkretna promjena štetnog ponašanja
 - uključivanje stručnog savjetnika
 - posredovanje mudrih članova porodice
 - obraćanje imamu
 - vremenski određen plan popravljanja odnosa

U slučajevima nasilja, ovisnosti, teške manipulacije ili ugrožavanja djece potrebno je uključiti stručne i nadležne službe. Islam ne traži od čovjeka da neograničeno trpi nasilje i poniženje.

27. RAZVOD BRAKA

Razvod je u islamu dozvoljen kada brak više ne ostvaruje svoju svrhu i kada su ozbiljni pokušaji pomirenja ostali bez rezultata. Ne treba ga koristiti kao prijetnju u svađi. Prije razvoda potrebno je upoznati se sa šerijatskim i građanskim posljedicama i zaštititi prava djece i obje strane.

Čak i kada brak završi, musliman ne smije postati nepravedan. Razvod ne daje pravo na klevetanje, iznošenje tajni, finansijsku osvetu ili korištenje djece kao oružja u sukobu.

28. DVADESET SMJERNICA ZA SRETAN BRAK

1. Svakodnevno pokažite ljubav riječima i djelima.
2. Klanjajte zajedno kad god ste u mogućnosti.
3. Zahvaljujte jedno drugome i za male stvari.
4. Ne spominjite stare greške u svakoj novoj raspravi.
5. Kritizirajte postupak, a ne ličnost.
6. Saslušajte supružnika bez prekidanja.
7. Priznajte grešku kada pogriješite.
8. Ne donosite velike odluke u ljutnji.
9. Ne prijetite razvodom.
10. Ne iznosite bračne tajne pred drugima.
11. Čuvajte vrijeme samo za vas dvoje.
12. Ne dopustite telefonu da zamijeni razgovor.
13. Primijetite umor i potrebe svoga supružnika.
14. Budite podrška u bolesti i iskušenju.
15. Poštujte porodicu svoga supružnika.
16. Razgovarajte otvoreno o novcu.

-
17. Ne uspoređujte supružnika s drugim ljudima.
 18. Njeguajte nježnost i bračnu bliskost.
 19. Zajedno učite, planirajte i činite dobra djela.
 20. Svakoga dana molite Allaha za bereket u svome braku.

29. PITANJA ZA BRAČNO PREISPITIVANJE

Osjeća li se moj supružnik sigurno pored mene?

Slušam li ga ili samo čekam priliku da odgovorim?

Jesam li zahvalan za ono što čini?

Jesam li spreman priznati grešku?

Čuvam li njegovu privatnost i dostojanstvo?

Dajem li porodici dovoljno vremena?

Da li naš dom približava djecu Allahu?

Jesmo li jedno drugome pomoć na putu prema Džennetu?

30. IZJAVA I DOGOVOR O MEHRU

Ime i prezime mladoženje		
Ime oca		
Ime i prezime mlade		
Ime oca		
Datum sklapanja braka		
Mjesto sklapanja braka		
Ukupna vrijednost mehra		
Opis mehra		
Dio koji se isplaćuje odmah - mu'adždžel		
Odgođeni dio mehra - muedždžel		
Vrijeme ili uvjeti dospijeca		

Mladoženja potvrđuje da je upoznat s činjenicom da je dogovoreni, a neisplaćeni mehr njegovo dugovanje prema supruzi. Mlada potvrđuje da je saglasna s navedenim iznosom, vrstom i načinom isplate mehra.

Potpis mladoženje: _____

Potpis mlade: _____

Svjedok 1: _____

Svjedok 2: _____

Ovlašteni imam: _____

Datum: _____

Napomena: Ovaj obrazac predstavlja evidenciju dogovora između supružnika. Za pravnu izvršivost prema građanskom zakonodavstvu potrebno je zatražiti savjet kvalificiranog pravnika.

31. NAŠ ZAJEDNIČKI BRAČNI DOGOVOR

Ovaj dio nije novi šerijatski ugovor niti zamjenjuje nikah. To je dobrovoljni podsjetnik supružnicima na vrijednosti prema kojima žele graditi zajednički život.

Mi, supružnici:

i _____

uzdajući se u pomoć Uzvišenog Allaha, obećavamo da ćemo nastojati:

1. čuvati namaz i pomagati jedno drugome u vjeri
2. razgovarati iskreno, smireno i s poštovanjem
3. ne vrijeđati, ponižavati, zastrašivati niti fizički povrijediti jedno drugo
4. ne koristiti razvod kao prijetnju
5. čuvati privatnost i bračne tajne
6. biti vjerni jedno drugome
7. otvoreno razgovarati o finansijama i ne skrivati dugove
8. savjetovati se o važnim porodičnim odlukama
9. poštovati obje porodice uz čuvanje granica našeg braka
10. pravedno dijeliti porodične i roditeljske obaveze
11. zatražiti pomoć kada sami ne možemo riješiti ozbiljan problem
12. ne koristiti djecu kao sredstvo pritiska
13. svakodnevno pokazivati zahvalnost, pažnju i milost
14. nastojati da naš dom bude mjesto sigurnosti, namaza, Kur'ana i halal života

Naši posebni zajednički dogovori

Potpis muža: _____

Potpis supruge: _____

Datum: _____

ZAKLJUČAK

Islamski brak nije samo ugovor između muškarca i žene. To je emanet pred Allahom, zajedničko životno putovanje i škola u kojoj se svakodnevno uče strpljenje, praštanje, zahvalnost, odgovornost i ljubav.

Nijedan brak nije savršen. Uspješni brakovi nisu oni u kojima nikada nema problema, nego oni u kojima supružnici ne zaboravljaju da se nalaze na istoj strani kada problemi dođu. Muž i žena nisu protivnici, nego saveznici i saputnici koji zajedno žele postići Allahovo zadovoljstvo.

Supružnici trebaju jedno na drugo gledati kao na neizbrušene dijamante. Kroz zajednički život susreću se sa svojim slabostima i navikama koje trebaju popravljati. Kada imaju iskrenu namjeru, strpljenje i spremnost da rade na sebi, njihova ljubav postaje dublja, zrelija i postojanija.

Ljubav nije samo osjećaj kada je sve lahko. Ljubav je i odluka da čovjek ostane pravedan kada je ljut, blag kada je umoran, vjeran kada je iskušan i zahvalan kada primijeti dobro.

„Gospodaru naš, podari nam u supružnicima našim i djeci našoj radost i učini da se čestiti na nas ugledaju.“ **El-Furkan, 74**

DOVA ZA MLADENCE I PORODICU

„Barekallahu lekuma ve bareke alejkumā ve džeme‘a bejnekuma fi hajr.“

Neka vam Allah podari bereket, neka na vas spusti Svoj bereket i neka vas sjedini u svakom dobru.

Allahu naš, podari ovim supružnicima iskrenu ljubav, međusobno razumijevanje, strpljenje i milost. Učini njihov dom mjestom namaza, Kur’ana, zikra, zahvalnosti i lijepog ahlaka.

Sačuvaj ih od svađe, nepovjerenja, oholosti, ljubomore, izdaje, nasilja i svega što udaljava srca. Pomozi im da jedno drugome budu podrška u dobru, utjeha u teškoći, oslonac u iskušenju i razlog približavanja Tebi.

Podari im halal i obilnu opskrbu, zdravlje, sigurnost i bereket u vremenu i imetku. Ako im podariš djecu, učini ih zdravom, čestitom i odgojenom, radošću očiju svojih roditelja i korisnim članovima ummeta i društva.

Allahu naš, podari im mudrost da razgovaraju kada se ne slažu, snagu da priznaju grešku, plemenitost da oprostite i strpljenje da zajedno prođu kroz životna iskušenja. Sastavi ih u dobru na ovom svijetu i, Svojom milošću, ponovo ih sastavi u Džennetu. Amin.



Bošnjacki islamski centar Hamilton

202 Barton Street, Stoney Creek, Ontario, Canada L8E 2K2
905 662-3678

Vjera • Zajednica • Usluga